



Domowina

ZWĚZK ŁUŽYSKICH SERBOW
ZWJAZK ŁUŽISKICH SERBOW
BUND LAUSITZER SOBEN

Program Domowiny

Zagronitosć – Wótwórjonosć – Zwěžanosć

Preambla

W lěse 1912 jo se załožyła Domowina ako kšywowy zwězk serbskich towaristwow. To jo było nabejne tšojenje w serbskich stawiznach. Z tym jo se wóla k zjadnošenju mócow w serbskem narodnem gibanju jasnje zwurazniła a přědny raz do statka stajiła. Pó měrnej rewoluciji 1989/90 jo se Domowina k politiski njewótwisnemu a nadstrońskemu kšywowemu zwězkoju Łužyskich Serbow¹ pšetwóriła. Žinsa jo Domowina kazniski pšipóznata zastupjačka zajmow serbskego luda. Słužymy swojemu ćlonkojstwoju ako tek celemu serbskemu ludoju.

Domowina se k Zakładnej kazni wuznawa. W zgromadnosći europejskich narodow smy rownogódne a zasajžujomy se za lichotu a měr. Wótpokazujomy kuždycku formu ekstremizma.

Program jo zakład za statkowanje kšywoweho zwězka. Žěłowe směrnice konkretizěruju zaměry programa. Kuždy, kótaremuž na Serbstwje a pšedewšym na našej rěcy zalažy, jo witany se w Domowinje angažěrowaś.

Zagronitosć za serbski lud statkowaś wuchada z našych stawiznow a z našogo wiženja na pšichod. Wótwórjonosć wóznamjenjujo, až smějo se kuždy z nami za zwopšawdnjenje serbskich zajmow zasajžowaś. Zwěžanosć zwuraznjujo se w zgromadnem procowanju wó wobstaše našogo luda.

Zagronitosć – wótwórjonosć – zwěžanosć su zakładne gronidła jadnanja Domowiny.

¹ Kuždežkuli pomjenjowanje wósobow w toś tom teksće se pšěgujo rownogódnje na wšykne rody.

Zakładne gronidła jadnanja Domowiny

Zagronitosć

Głowny zaměr našogo zgromadnego statkowanja jo rěc, sedleński rum, kulturu a identitu serbskego luda šćitaś, spěchowaś a wuwijaś. Rozšyrjenje pšawa, w serbskich nastupnosćach sobu- a samopóstajaś směś jo wažne šěžyšćo našogo politiskego žěła. Ako kazniski pšipóznate zastupnistwo zajmow Serbow jadnamy zagroniše za wšykných Serbow. Comy-lic serbstwoju pšichod zawěsćiš, ma se kuždy jednotliwc pó swóжих móžnosćach sobu za to zasajžowaś.

Wótwórjonosć

Domowina jo wšyknym Serbam a pšijašelam Serbow wótwórjona – lěc bydle we Łužycy abo zwenka njeje, lěc jednotliwc, kupka abo towaristwo. Pódpěrujemy wšakorake móžnosći za wobžělenje na serbskem towarišnostnem a kulturnem žywjenju. Smy demokratiski organizěrowane zastupnistwo serbskich zajmow a jadnamy transparentnje. Naše ćlonki su zakład statkoweje seši serbskeje ciwilneje towarišnosći. Kuždy jo pšepšosony sobu statkowaś.

Zwězanosć

Serbske stawizny, kultura, rěc a z toho wuchadajuca narodna identita, ako tek zgromadne narodne procowanje – wšo to nas zwězujo. Rownogódnosć dolno- a górnoserbšćiny zjadnošujo naš lud. Statkujomy w zmysle toś teje zwězanosći, kótaraž wšykne regiony Łužyce wopšimjejo. Rowno tak aktywity Domowiny wšakorakich partnerjow we Łužycy a zwenka njeje zwězujo. Ako zastupjačka serbskich zajmow póbitujo Domowina Serbowkam a Serbam ako teke pšijašelam Serbow pomoc pši narodnem žěle.

Serbski lud skšušís, rěc a kulturu wobchowaś

I. Zwězk Łužyskich Serbow

Domowina – Zwězk Łužyskich Serbow – jo zastupnica zajmow serbskego luda. Jeje člonkojske župy, kupki a towaristwa su nosarje towarišnostnego žywjenja w Serbach. Jich žěło pódprěš jo nam bytostny nadawk. Aktiwne sobužěło jednotliwcow, towaristwow, župow a organow Domowiny pší zwopšawdnjenju wobzamknjenjow Domowiny jo zakład za wuspěšne statkowanje kšywowego zwězka. Zgromadnje wabimy za statkowanje w Domowinje. Kuždy, lěc jednotliwc abo towaristwo, jo nam ako člonk kšywowego zwězka witany. Zakład za zgromadne žěło twórje wustawki a program Domowiny.

II. Politiske zastupnistwo

Domowina zastupujo zajmy serbskego luda. Toś te zastupnistwo jo w serbskima kaznjoma kraja Bramborska a Lichotneho stata Sakska zapisane. Wóna stara se wó rozšyrjenje pšawow a winowatosćow za sobu- a samopóstajenje, pśedewšym w serbskich politiskich, kulturnych a kublańskich nastupnosćach. Jadnamy ze wšyknyimi demokratiskimi akterami na komunalnej, krajnej, zwězkowej ako tek europejskej rowninje. Wužaržujomy kontakty k narodnym mjeńšinam a drugim ludam. Pší tom jo nam wažne, wědu wó Serbach we Łužycy a zwenka njeje dalej rozšyrjowaś.

III. Šćit a wózroženje serbskeje rěcy

Serbska rěc jo nam nejdrotnejše derbstwo našych přědownikow. Jeje woplěwanje, šćit a wózroženje jo nam nejwažnejšy nadawk. Pózbužujomy familije k woplěwanju serbskeje rěcy. Zasadźujomy se za zwopšawdnjenje efektiwnych, rěc spěchujucych napšawow za wšykne generacije, wósebnje w žišownjach a šulach. Pšewježomy a pódpěrujomy napšawy k wóžywnjenju serbskeje rěcy wšuži tam, žož wóna tuchylu kšuty wobstatk zjawneho žywjenja njejo. Napóranje nowych rěcnych rumow jo wažny wobstatk našych procowanjow.

IV. Kultura a sport, wuměłstwo a wědomnosć

Kulturne žěło, sportowe gibanje, wuměłstwo a wědomnosć su wažne slupy serbskego žywjenja a žělabnosći kšywowego zwězka. Rowno tak su aktery na toś tych pólach póslańce našogo luda we Łužycy a zwenka njeje. Pódpěrujomy wuměnu wósebnje ze słowjańskim wukrajom a drugim narodami. Spěchujomy zgromadne žěło serbskich institucijow z cesnoamtskimi akterami. Zgromadne projekty institucijow wobogašuju kulturne žywjenje w Serbach.

V. Nabóžno-narodne žywjenje

Bogate derbstwo nabóžno-narodnych tradicijow a nałogow jo wobstatk žywjenja wjele Serbow. Toś te aktiwne woplěwaś jo wažny zakład za wutwórjenje a skšusenje teke narodnego wědobnja. Wósady su njewuzbytne serbske rěcne rummy, socialne seši a domownja za žywu wěru Serbow.

VI. Łužyca ako góspodaŕski rum

Góspodaŕstwo jo rěp Łužyce a wobliwujow njepósrědnje socialne položenje našeje domownje a serbskego luda. Ze spěchowanim serbskeje rěcy a kultury pówušyjomy atraktiwitu regiona. Wósebnje dwójo- a wěcejrěcnosć jo za lužyske pśedewzeša wudobytk. Pódpěrujomy napšawy, kótarež pógnuwaju regionalne góspodaŕstwo k wužywanju serbskeje rěcy. Zasajžujomy se za kooperaciju Łužyce ze słowjańskim wukrajom, wósebnje z Pólskeju a Českeju. Wugronijomy se za łagodny turizm, kótaryž zmóžniwo góscam serbsku kulturu we Łužycy zeznawaś.

VII. Łužyca – naša domownja

Łužyca jo srjejžišćo a domownja Serbow. Zasajžamy se za to, aby se serbskosć w sedleńskem rumje dalej zmóčniła a wuwijała. Žiwamy na zaměrne zapšimowanje serbskeje rěcy a kultury do regionalnego, komunalnego a krajnego planowanja. Stolěše trajuće wudobywanje brunice zawóstajijo serbskemu ludoju wjelike škódy. Proces strukturneje změny póbitujo nam nowe perspektiwy za wóžroženje a spěchowanje serbskeje rěcy a kultury.

“Traś dej Serbstwo, zawóstaś!”

Handrij Zejler, 1842